



Zelandicarum insularum exactissima et nova descriptio

<https://hdl.handle.net/1874/349810>

ZELANDE.



Toutes les Isles situées entre Flandres, Brabant, Hollande, & la Mer, comprend Zelande sous soy. Dont y en a iusques au nombre de sept principales, avec encore certaines autres de petite importance, faisant toutes ensemble vne Conté. Ces Isles sont tellement subiectes à la tempeste & inconstance de la Mer, que ce que l'on en escrit auourd'huy pour chose veritable, demain (belas) n'en sera rien: car l'vne des fois vne de ces Isles sera grande, demain, ou apres, la Mer (en y ostant quelque piece) la rendra petite. Aucunes fois la Mer passant par le milieu de quelque Isle, d'vne en fera deux; & souuentefois tout le contraire, à scauoir, de deux vne, à l'occasion de certains bancs sablonneux, qu'elle y iettera entredoux. Auourd'huy on y contera autant de villes, demain, ou apres, la Mer en aura emporté vne; de sorte que de nostre temps, ou de memoire d'homme, on y a veu perir en Mer (comme escrit Lemnius) cent mille bonniers de terre. Nonobstant nous le descrirons comme il est de present en estre. Ces Isles se diuisent pour le iourd'huy par l'Escant en deux parties: du costé de Leuant, ilz les appellent, Beoosterscheldt, comprenant ces trois Isles, Scouwe, Duuclandt, & Tole. Du costé de Ponant, y a Bewesterscheldt, contenant quatre Isles, Walchere, Suydbeuerlandt, Nordbeuerlandt, & Wolferdyck. En ces sept Isles y a huyet villes murées, à scauoir, Middelbourg, Vlissingue, & Veer, en Walchere; Romerswael, & Goes, en Suydbeuerlandt; Ziericzee, en Scouwe; Tole, & Martensdyck, en l'Isle ainsi appelée: sans aucunes autres, qui ne sont pas murées, ayant Police ciuile; & encore cent & deux villages. La ville de Middelbourg est la Capitale de toutes ces Isles; & y a l'estape de tous les vins qui par mer y arriuent d'Espaigne, Portugal, & France. Ces Isles sont assez fertiles, de sorte que le bled venant de là, est estimé le meilleur; & vn bonnier de terre y porte plus de bled, que deux au pays de Brabant. Mais il n'y a point d'eau douce, ny bon air, & peu de bois; au lieu duquel ilz bruslent des mottes. La garance y croist en telle abondance, qu'on en fournit quasi toute l'Europe.

Les habitants sont quasi tous Mariniers, ou Pescheurs, auquel mestier ilz font telle diligence, qu'ilz fournissent l'Angleterre de poisson; chose toutes fois esmerueillable, veu que ledit pays est enuironné de la Mer. Il y a grande trafficque de sel, que l'on y amene d'Espaigne, de Portugal, & de France, lequel (non sans grand prouffit) ilz scauent bien rendre blanc. De sorte, que le bled, la garance, le poisson, & le sel, rendent les habitans riches, par le grand train de Marchandise qu'ilz en font. Car ilz sont naturellement diligens & soigneux pour acquerir du bien, (comme escrit L. Lemnius de Ziericzee.) Ilz sont assez fins & preuoyants, & ne se laissent pas aisement tomper, ny abuser, de belles parolles, ou par faintise.

Ce peuple (comme on pense asseurement) est venu icy du Royaume de Denemarq, d'vne Isle située au milieu du pays, appelée Zelande, en laquelle y a la ville de Coppenhaue, ayants appelé ce pays cy du nom de leur patrie Zelande. Mais encore que cela fustent bourdes, si est-ce que par sa situation il doit, & à bon droit, estre appelé Zelande, comme si diriez,
Pays du Mer.